



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

49. Kalenderwoche – ab 5. Dezember 2010

Bubsegahl

Is schon scheen, wemmor märgn dud, dass sisch de Regierung in Bährlien Sorschn machd um unsoreens! Isch meene, mir kenndn dähn ja eischendlich bubsegahl sein! Die ham mid uns doch bloß noch zu dun, wenn mir die wieder ma wähl'n solln dun missn. Ansonsdn - die machn dord ohm ihre Geschäfdschn, dun bißl rummauschln mid de Gesetze, dun de Bankn un Bleideländor vorm Banggrodd redddn... - is ja ooch nisch das eischne Geld, wasse daderfiehr hinleeschn missn!

Nee, wenn die ihr eischnes Geld nemm missdn... uns wenss zwee Euros sein dädn, die se rausriggn missdn! - da dädn einische Bankn längsd off dor Nase lieschn! Un Irland un Grieschnland ooch!

Abor es is ja ehm nisch das eischne Geld, wasse vordeeln dun! Offbassn missn se eischendlich bloß beim Vordeeln, dass am Ende noch genuch fiehr de Diähdn iebrisch bleim dud.

Nee, mir kenndn dähnen da ohm werglich bubsegahl sein! Abor mir sinns nisch! Nee! Die machn sisch um uns Sorschn! Diefschirfende Sorschn! Ofd!

Un jedzde grade widdor weeschn dor Derrorgefahr! Ja, off de Derrorgefahr sinn se gekomm, weil die annorn Broblehme, dies gähm dud, viel schwierischer sin. Zum Beischbiel das mid die Migrandn, odor das mid dähm Adomschdrom, odor das mid die Reischn, die vor Reischsein nisch mähr ausm Lachn rauskomm dun, odor de allgemeine Vorbleedung dursch Färnsähn, odor dor Griesch in Affghanisdahn, odor ... na, Ihnen dud da beschdimmd ooch selbor noch was einfalln, wo de Gagge ziehmlich am Dambfn is! Nee, de Derrorgefahr is da viel scheenor! Die dud ja von außn komm. Da kann ershdema keenor davor. Dann dud mor ooch nisch genau wissn, was eischendlich

los is, un währ uns bedrohn dun will. Off dor annorn Seide kann keenor wiederleeschn, dass es die Gefahr gähm dud. Ährlisch - de Derrorgefahr is dor reensde Seeschn fiehr de Bolledigg un ooch fiehrs Färnsähn. Im Bundesdaach un in de Dorgschohs kenn se sisch nu lange un ausdauernd driebor schdreidn, was de Derrorgefahr fiehr eene Gefahr is - wesvorweeschn, woderdursch un fiehr wieviel? Endlose Dheorien kenn se offschdelln! Solange keenor weeiß, was eischendlich bassiern soll, kann jedor vormudn wassor will! Un die annorn Broblehme, die wo dambfn dun, ham sisch erschdema erledischd! Derrorgefahr is scheenor! Jedor kann rumsabborn, wassor will!

De Derrorgefahr is mindesdens so scheen, wie de Gefahr ausm Osdn odor de gelbe Gefahr! Wenn nisch sogahr scheenor als wie de Schweinegribbe!

Nee, de Bolledigor kenn jedzde alle mid diefe Sorschnfaldn im Gesischd rumloofn. Alleene unсор Innenminisdor, dor De Missere, dähn wo de vorhähr ieborhaubd nisch gemärgd hasd, dass dähr da is, dähr is jedzde im Middlbungd un dud ooch werglisch sähr scheen dragisch un sorschnreich guggn! De Bollezeior missn mid finsdore Bligge rumloofn un alle, die irschendwie ausländisch aussähn, scharf ins Ooche fassn! De Ieborschdundn grischn de Bollezeior beschdimmd ooch bezahld. Bei Derrorgefahr!!!! Da darf mor keene Miede un Gosdn scheun! Subor!

Eduard Sachsenmeyer